

समां - 12:25 hrs.

<><><><><><>

CM Reservation

मुख्यमंत्री उमर अब्दुल्ला होरें आखेया ऐ जे मंत्रिमंडल तौले गै नौकरी लेई आरक्षण गी तर्कसंगत बनाने दे प्रस्ताव उप्पर चर्चा करोग। उनें आखेया जे सरकार नै Model Code of Conduct ते चुनां खत्म होने गी बलगेया ऐ तां जे कुसै बी जटलिता थमां बचेया जाई सकै। मुख्यमंत्री होरें आखेया जे मुत्तलका मंत्री इस प्रस्ताव गी उसलै पेश करगन- जिसलै मंत्रिमंडल दी अगली बैठक होग। उनें एह गल्ल नैशनल कांफ्रेंस दी दो- रोजा कार्य समीति दी बैठक मगरा आखी।

<><><><><><>

Jammu Udhampur Highway

इलाकाई सम्पर्क गी बढ़ावा दिंदे होई इक महत्वपूर्ण उपलब्धी तैहत जरनैली सिड़कें सरबन्धी राष्ट्रीय प्राधिकरण एन.एच.ए.आई. आसेया बनाई गेदी जम्मू-उधमपुर जरनैली सिड़क गी निर्धारत समें-सीमा थमां पैहले गै पूरा करी लैता गया ऐ। हून एहदे करी जम्मू ते उधमपुर बश्कार यात्रा दा समां दंऊ घेंटे शा घटियै छड़ा इक घेंटे होग। जम्मू च जरनैली सिड़कें सरबन्धी राष्ट्रीय प्राधिकरण दे क्षेत्रीय दफ्तर नै “एक्स” पर इक पोस्ट च आखेया ऐ जे नंदिनी Wildlife Sanctuary चा लंघने आहली इस आधुनिक जरनैली सिड़क च चार दिन - टयूब सुरंगां ते पुल शामिल न- जिनेंगी सुरक्षा ते पर्यावरण दी हिफाजत यकीनी बनांदे होई गै तयार कीता गेदा ऐ। अधिकारियें दस्सेया जे इस परियोजना कन्नै यात्रा गी सखल्ला बनाया जाग ते एह जम्मू-कश्मीर च सिड़क ढांचे दे विकास च इक महत्वपूर्ण मील दा पत्थर साबत होग।

<><><><><><>

Satish Broadband

सूचना टेक्नोलाजी मंत्री सतीश शर्मा होरें समूलचे केन्द्र शासत प्रेश च ब्रॉडबैंड नेटवर्क दा विस्तार करने ते डिजिटल ढांचे गी तगड़ा बनाने दी जरूरतें पर जोर पाया। नेशनल ब्रॉडबैंड मिशन दे डिप्टी डीरेक्टर जनरल हुं'दे कन्नै लाई गेदी इक बैठका दे दरान शर्मा होरें ई-लर्निंग, टेलीमेडिसिन, डिजिटल स्किलिंग ते सुशासन गी बढ़ावा देने लेई शैही ते दूर-दरेडे इलाकें च फॉस्ट ट्रेकिंग हाई-स्पीड इंटरनेट पुज्ज दी जरूरतें पर जोर पाया। उ'नें सूचना टेक्नोलाजी विभाग ते टेली-कम्युनिकेशन विभाग बश्कार नेइमे तालमेल दी गुजारश कीती तांजे टेलीकॉम परियोजनाएं लेई मंजूरियां देने दी प्रक्रिया गी चुस्त-दुरुस्त बनाया जा ते इस दिशा च पेश औने आहली रूकावटें गी बी दूर कीता जा। मंत्री होरें जोर देइयै आखेआ जे युवाएं गी सशक्त बनाना, सार्वजनिक सेवाएं च सुधार आहनना ते प्रदेश च आर्थिक विकास गी रफ्तार देने लेई इक तगड़ा डिजिटल संपर्क अत्त लाजमी ऐ।

<><><><><><>

Awantipora Hideout

पुलस नै दस्सेया ऐ जे सुरक्षाबलें शुक्रवार पुलवामा जिले च जैश-ए-मोहम्मद आतंकवादी संगठन दी छप्पने आहली थाहर दा पता लाया ते आतंकवादियें दा साथ देने च शामिल इक आरोपी आतंकवादी गी गिरफ्तार करी लैता। “एक्स” पर इक पोस्ट च अवंतिपोरा पुलिस नै दस्सेया जे इक सूह मिलने मगरा 42 राश्ट्री राइफल्स ते 180 बटालियन सी.आर.पी.एफ कन्नै रलियै ननेर मिदूरा च घेराबंदी ते तलाशी अभियान चलाया गया। इस अभियान दरान जैशे-मुहम्मद गुट दे इक मददगार गी गिरफ्तार कीता गया- जेहदी पंछान Nazir अहमद गनेई दे तौरा पर कीती गई। पुलस नै दस्सेया ऐ जे इस दरान 2 ग्रेनेड- इक डेटोनेटर ते होर विस्फोटक समेयान बरामद कीता गया ते अगड़ी जांच अजें जारी ऐ।

<><><><><><>

PM MKB

प्रधानमंत्री नरेंद्र मोदी होर कल 30 नवम्बर गी अपने रेडियो कार्यक्रम “मन की बात” दे राएं देश-बदेश च रौहने आहले श्रोताएं कन्नै अपने बचार सांझे करडन। हर म्हीने दे खीरले ऐतवारें दिनै 11 बजे प्रसारित होने आहले इस कार्यक्रम दी एह 128मीं किश्त होग। एह कार्यक्रम आकाशवाणी समाचार दी वैबसाईट newsonairmobile ऐप्प पर बी प्रसारित कीता

जाग। एहदे कन्नो-कन्नी एह प्रोग्राम आकाशवाणी समाचार, DD News, प्रधानमंत्री हुं'दे दफ्तर ते सूचना ते प्रसारण मंत्रालय दे यू-ट्यूब चैनलें पर बी प्रसारित कीता जाग। आकाशवाणी जम्मू पर मन की बात दे तुरत मगरा एहदा डोगरी भाषा च अनुवाद प्रसारत कीता जाहग। डोगरी अनुवाद स्हाड़े श्रोता कल राती 8 बजे इक बारी परतियै सुनी सकदे न। आकाशवाणी दे क्षेत्रीय समाचार एकांश कल्लै दे मन की बात कार्यक्रम पर इक विशेष परिचर्चा रातीं साइडे 10 बजे प्रसारत करोग जिसी तुस स्हाड़े इस्से चैनल मिडीयम वेव 303 मीटर यानि 990 किलोहार्टस ते एफ.एम. 100.3 मैगाहार्टस पर सुनी सकदे हो।

<><><><><><>

CS Drug Abuse

मुख्य सचिव अटल डुल्लु होरें केन्द्र शासत प्रदेश च नशाखोरी दे खलाफ इक व्यापक रणनीती बनाने लेई NITI आयोग दे सदस्य डाक्टर वी.के. पाल हुंदे कन्नै उच्च स्तरीय बैठक कीती। AIIMS दिल्ली- PGIMER चंडीगढ़ दे माहिरें ते जम्मू-कश्मीर दे वरिष्ठ सेहत अधिकारियें इस बैठक च हिस्सा लेया। इस बैठक च प्रवर्तन-परामर्श- इलाज-पुर्नवास ते समुदाय दी भागीदारी उप्पर ध्यान दिता गया। डाक्टर पाल होरें जम्मू-कश्मीर दे समग्र दृष्टिकोण दी सराहना कीती ते हिमाचल प्रदेश दे सफल मॉडल गी अपनाने दा सुझा दिता। इस बैठक दा मकसद जमीनी स्तर उप्पर परामर्श गी मजबूत करना- मरीजें दी सेवा च बाददा करना ते पूरे यू.टी च मादक पदार्थ दे दुरुपयोग कन्नै निबड़ने लेई इक मजबूत ढांचे दा निर्माण करना हा।

<><><><><><>

Weather Update

जम्मू-कश्मीर च अगले 4 दिनें दे दरान तापमान च 1 शा 2 डिग्री सैल्सियस तगर दी कमी आने दी संभावना ऐ। मौसम विभाग मूजब औंदी 2 दिसम्बर गी खासकरियै दपैहरी लै मौसम बदलोखड़ा बने दा रौहग। ऊआं 3 ते 4 दिसम्बर गी मौसम साफ रौहग। एहदे मगरा 5 दिसम्बर गी दपैहरी दे बेल्लै फही बददल घनोई सकदे न ते इस दरान कश्मीर च

मती सारी थाहरें ते जम्मू खिते दे किश इलाकें च हलके थमां दर्मेयाने दर्जे दी धुंध पेई सकदी ऐ।

